

2 Korin

Naoo itəm tatol kəiu lan itəm Pol təməte tuwin kəm iəfak min ikin Korin

Nəghatən əkuəkir rəha naoo u 2 Korin

?Pah təməte naoo u? Aposol Pol təməte naoo u.

?Təməte tatuwin kəm pah? Təməte tatuwin kəm niməfak rəha Korin, ne iəfak min rəha profens Akaea.

?Nəmegəhən tahro nulan nian təməte? Pol tinəməte rəkis naoo kisił mahl-ipən kəm niməfak rəha Korin. Inu naoo itəm tatol kuwit lan. Məto naoo itəm tatol kitiəh, ne naoo itəm tatol kisił, ilau kəmiakə. Naoo itəm tatol kəiu, inu 1 Korin, kən e naoo u in təməghat əskasik kəm ilat məmə okotəg-ətuatip-in nolən rat min rəhalat, kən in təməgətun min ilat e natimnat pisin min neen. İlat tepət e niməfak kotətəu-pən nətəligən rəha Pol itəm təməte e naoo 1 Korin. Məto neen əh-ikin, ilat koatən məmə Pol in sənəmə etəm-iasol, kən təsətuatipən məmə in otəghat min nəhlan. Kən ilat koatən məmə in tatol wək rəhan o nosən əm mənı.

?Təməte naoo u o naka? Pol in təməte naoo u matəgətun məmə in aposol kit, kən Ughin in təmos-ipən wək u kəm in, kən tətuatip əm məmə in otəghat nəhlan kəm ilat. Kən in tolkeike məmə otən-iəhau nəgətun eiueiuə min itəm koatatig Korin.

Pol təmən təwir kəm ilat

¹ Io Pol, itəm Uhgin təmitəpun e nəwian məmə io aposol rəha Kristo Iesu, iatəte naoa u itimlau piətat Timoti. Naoa u tatimnə kəm itəmat, niməfak rəha Uhgin əpəh Korin, ne iəfak min ilat rafin əpəh ikin Akaea. ² Pəs Uhgin Tata rəhatat ne Iərəməərə Iesu Kristo, okuawte-in nəwīrən ne nəməlinuən kəm itəmat.

Uhgin itəm tatol kepin netənim

³ Pəs kotənwiwi Uhgin, u in Uhgin ne Tata rəha Iərəməərə rəhatat Iesu Kristo. In Tata itəm in nəukətin nasəkitunən, kən in Uhgin itəm nol kepinən rafin tatisi-pən ron. ⁴ In tatol kepin kitat e nəratən rafin rəhatat məmə kitat kotitun nol kepinən netənim e nəratən pisin pisin min. Kən kitat kotol kepin ilat e nolən rəha nol kepinən itəm Uhgin təmol kəm kitat. ⁵ Tahmen əm e nahnəən itəm Kristo təmos, təmuwa min e nəmegəhən rəhatat. Kən e nolən kitiah əm, Kristo in suatip məmə nol kepinən təmuwa pik e nəmegəhən rəhatat, kən roiu nol kepinən rəhatat tatuwin min o netənim pisin pisin min. ⁶ Okəmə itimat ekoatəto nahnəən, nahnəən əh tatuwa otimat nian ekoatən-iarəp namnusən təwīr, kən namnusən təwīr əh otol kepin itəmat mosmegəh itəmat. Okəmə Uhgin təmol kepin itimat, tatol məmə itimat ekotitun nol kepinən itəmat. Kən noan nol kepinən əh, tatoe-in e nəmegəhən rəhatəmat, kən nian nəkotatig e nahnəən kitiah əm itəm kitat kotatig lan, tatasitu etəmat məmə onəkotətul əskasik matuwīn matuwīn. ⁷ Itimat emotələhəupən əskasik rəhatimat nətəligən o Uhgin otəmat məmə onəkotətul əskasik. Tol nəhlan məto-inu

kitat rafin koatatig e natigən kitiah əm məmə, itəmat nakoatəto nəhməən itəm ekoatatig lan, kən tahmen-ahmen əm məmə nakotos nol kepinən kitiah əm rəha Uhgin itəm emotos.

⁸ Piak min ne winik min, ekotolkeike məmə nəkotitun wir nian əskasik min itəm emotatig lan e profens ikin Esia. Nəratən asol min kəmotu itimat, taprəkis-in nəsanənən rəhatimat, təmol nikitimat təht məmə okəm-naka ekotimis. ⁹ Nipahrienən, itimat emotəto məmə kinəgəhan-in rəkis itimat məmə ekotimis. Məto nian əskasik min əh kəmotuwa məmə esotagileən etimat, məto ekotagile e Uhgin itəm tatol etəm təmimis təmegəh min. ¹⁰ In təmosmegəh itimat e nəratən asol əh itəm təmatuwın o nimisən, kən in otosmegəh itimat e nəratən itəm otəpanuwa. Emotələhəu-pən əskasik rəhatimat nətəligən lan məmə in otosmegəh min itimat. ¹¹ Kən in otol nəhlan nian nakotəfak otimat məmə, netəmim tepət okotənwiwi Uhgin o natimnat wir itəm in otol kəm itimat məto-inu netəmim tepət kəmotəfak otimat.

Pol təmauhlin rəhan nətəligən o rəhan naliwəkən

¹² Roiu ekən nəghatən u məsaulisən məmə, e nətəligən rəhatimat, nikitimat təht məmə esotolən nat kit tərət e nolən rəhatimat. E nolən min rafin itəm emotol, itimat emotətəu-pən suatip itəm Uhgin təmitəpun məmə emotəghat ətuatip əm moatən əhag-əhag nəghatən. Emotol nolən əh kəm netəm əpnəpin əm rəha nətueintən, kən motol taprəkis kəm itəmat. Esotəghatən e nitunən əm rəhatimat rəha nətueintən, məto emotagile əm e nəwırən rəha Uhgin. ¹³⁻¹⁴ İatən nəhlan məto-inu,

esotæteæn næghatæn kit itəm tiäkis otəmat o nafiñæn, o nitunæn nīpətin. Roiu, nəkotitun məsin nətəligən rəhatimat, məto iakolkeike pik məmə nian kit onəkotitun rafin. Kən e nolən əh, nian Iərəməərə Iesu otuwa min, itəmat onəkotagien otimat tahmen min məmə itimat ekotagien otəmat.

¹⁵⁻¹⁶ Məto-inu enitun məmə nakotagien otimat, nikik təht məmə nian ekatuwin Masetonia, ekaupən mimnə məplan itəmat, kən nian ekitəlig Masetonia, ekimnə min məplan itəmat. Tol nəhlan, nakatos nəwīrən mau kəiu. Kən uarisig e itəm min əh, onəkotasitu lak motahl-ipən io ekuwin nitən Jutia. ¹⁷ ?Nikitəmat təht məmə, nian emol nətəligən min əh, məto emol əpnəpin əm? ?O, kəm-naka nətəligən rəhak təmisi-pən e nolən rəha nətueintən, tahmen e netəmin itəm koatən “əwəh” ne “kəp” e nəghatən kitəh əm?

¹⁸ Itəmat nəkotitun məmə Uhgīn nian rafin tatol rəhan nəghatən, kən io min, rəhak nəghatən kəm itəmat sənəmə, “əwəh” ne “kəp,” ¹⁹ məto-inu rəhak nəghatən o Nəti Uhgīn Iesu Kristo, itəm eməhalən-iarəp kəm itəmat itiməhal Saelas ne Timoti, sənəmə, “əwəh” ne “kəp,” məto e Kristo, nian rafin rəhak nəghatən in “əwəh,” in nīpahrienən. ²⁰ Tol nəhlan məto-inu, nat əpnəpin nəniəkisən kuwəh Uhgīn təmol, ilat kotuwa nīpahrienən e Kristo, inu nəghatən “əwəh” rəha Uhgīn. Tol nəhlan, e Kristo, kitat koatən “Amen, Əwəh” kəm Uhgīn, kən moatiləs-ipər nərgin lan. ²¹ Uhgīn əm tatol itimat ekoatətul əskasik e Kristo kitat min itəmat. In təmitəpun kitat, ²² kən təmol mak e nəmegəhən

1:13-14: 2 Kor 5:12; Fil 2:16

1:15-16: 1 Kor 16:5-6

1:19:

Wək 18:5

1:20: Nol Əpən 3:14

rəhatat məmə kitat rəhan mīn, kən təmələhəu-pən rəhan Narmin e nikitat məmə kitat okotitun roiu məmə rəhan naniəkisən mīn, ilat rafin okotuwa nīpahrienən e nəmegəhən rəhatat o nian kit.

²³ Kən roiu, okəmə esənən nīpahrienən, pəs Uhgīn otol nalpīnən kəm io. Eməsuwamən Korin məto-inu esolkeikeən məmə ekən nəghatən əskasik kit kəm itəmat. ²⁴ Esotolkeikeən məmə ekotərəməbə e nahatətəən rəhatəmat, kəp. Məto ekotol wək kitat mīn itəmat o nagienən rəhatəmat, məto-inu itəmat nīnoatətul əskasik rəkis e nahatətəən rəhatəmat.

2

¹ Tol nəhlən, enən rəkis e nīkik məmə okol esimnə mīnən məplan itəmat mol nikitəmat tahmə. ² ? Emən nəhlən məto-inu, okəmə ekol nikitəmat tahmə, pah u ikin-un otol io nīkik tagien? Itəmat əm, itəm emol nikitəmat tahmə. ³ Kən eməte naoa əh, məmə nian ekimnə, esətoən tərət e nīkik. Esolkeikeən məmə netənim itəm okotəkəike motol nīkik tagien, ilat okotol məmə ekəto tərət. Eməte naoa əh e nolən əh, məto-inu enitun məmə kitat kitiah əm, kən nian nīkik tagien, kən nikitəmat mīn tagien. ⁴ Tol nəhlən, nian eməte naoa əh kəm itəmat, nīkik təpou pīk otəmat, kən nīkik titəgit, nahui nəmtək tiah otəmat. Esətoən naoa əh məmə otol nikitəmat təpou, məto eməte məmə onəkotitun rəhak nolkeikeən asol otəmat.

Aluin nolən rat mīn rəha nol təfagə

⁵ Etāmim itəm tāmōl nərātən, tāmōl io ekəto tərāt, mətō tāmōl itəmat rafin nakotəto tərāt pik, mətō es-olkeikeən māmə nəghatən rəhak e nat u in təskasik pik. ⁶ Nalpīnən itəm itəmat tepət nāmotos-ipən kəm in tīnahmen. ⁷ Mətō roiu əh, nəkotəkəike motaluin rəhan nolən rat kən motol-wir nīkin, māmə nīkin otəsəpou pikən mol təme e rəhan nāmegəhən. ⁸ Iatətapəh əskasik otəmat māmə nakotuwīn motol təwir kəm in māmə in otitun rəhatəmat nolkeikeən ron. ⁹ Eməte naoa əh kəm itəmat māmə ekəplan māmə onəkotol nəwiak e natimnat rafin, o kəp. ¹⁰ Okəmə itəmat nəkotaluin nolən rat rəha suah kit, io mīn ekaluin rəhan nolən. Okəmə suah əh tāmōl nat tərāt neen māmə io ekəkəike maluin rəhan nolən, mətō enaluin rəkis rəhan nolən e nīganəmti Kristo. Emol nəhlan māmə otasitu etəmat ¹¹ māmə Setan otəsərəkīnən kitat e rəhan neīueīuəən mīn, mətō-inu kitat kotitun rəkis rəhan nətəligən o nolən nərātən.

*Netāmim itəm koatən-iarəp
namnusən təwir*

¹² Nīan emuwīn əpəh Troas o nən-iarəpən namnusən təwir rəha Kristo, eməplan māmə Iərəmərə tāmōl suatip kəm io. ¹³ Mətō esatig əməlinuən e rəhak nətəligən mətō-inu, eməsəplanən piak Təetas ikin əh. Kən emauiatipin ilat, miet muwīn Masetonia.

¹⁴ Pəs kotənwiwi Uhgin, mətō-inu in tāmōl win e rəhan tikimīr mīn e nəluaginən. Kən tahmen e kig kit itəm tāmōl win e nəluaginən minatitəlig matit rəhan mopael mīn ne rəhan tikimīr mīn, Uhgin tatit itəmat e Kristo. Kən itəmat rəhan mīn

netəmim itəm ioatən-iarəp nenatigən rəha Kristo, kən nenatigən əh in tahmen e nəmiəwın kit itəm tatuwın ikin pisin-pisin min. ¹⁵ E niganəmti Uhgin, itimat ekotahmen e nəmiəwın rəha Kristo kəm netəmim rafin, netəmim itəm Uhgin tatosmegəh ilat, ne netəmim itəm okotuwın e nalpınən rəha Uhgin. ¹⁶ Itimat nəmiəwın rəha nımisən kəm neen itəm tatəgətun ilat məmə okotimis. Kən itimat nəmiəwın rəha nəmegəhən kəm neen, itəm tatəgətun ilat məmə Uhgin otosmegəh ilat. ?Kən pah u titun nolən wək asol əh? ¹⁷ Məto itimat esotahmenən e netəm əpnəpın min, itəm koatən-iarəp nəghatən rəha Uhgin o nos əmən məni. Kəp, məto Uhgin təməhl-ipən itimat, kən e Kristo, itimat ekotən-iarəp namnusən təwir e niganəmti Uhgin, kən nəghatən rəhatimat təmisi-pən e nikitimat itəm tətəatip əm.

3

¹ Okəmə naka nikitəmat təht məmə enoatıləs-ipər itimat məmə itəmat onəkotegəhan lan. Netəmim neen okotəkəike motos naoa kit itəm kəməte elat nian koatuwın o netəm kotəruru ilat. ?Təhro nikitəmat təht məmə suah kit otəkəike məte naoa nəhlən etimat kəm itəmat? ?O, təhro itəmat əm nakotolkeike məmə onəkotəte? !Kəp! ² Itəmat atip əm nəkotahmen e naoa itəm tatol əp wək rəhatimat. Naoa əh kəməte-pən e nikitimat, itəm netəmim rafin koatafin kən moatitun. ³ Itəmat noa rəha wək rəhatimat. Kən nəmegəhən rəhatəmat tatəgətun məmə itəmat naoa kətafin itəm Kristo təməte. Kristo təməte naoa əh e Narmin Rəha

Uhgin itəm tatəmegəh, məto təsəteən e nelmi etəmim. Kən in təməsəte-pənən e kəpiel epin-epin, məto təməte-pən e niki netəmim.*

⁴ Itimat esotəginən o nənən nəhlan otəmat məto-inu itimat ioatatig e Kristo, kən moatahatətə əskasik e Uhgin. ⁵ Nikitimat təsəhtən məmə itimat əm ekotahmen o nolən wək u, ne noan rəha wək. Məto Uhgin əm tatol məmə itimat ekotitun nolən wək. ⁶ In təmol məmə itimat ekotahmen məmə ekotuwa rəhan iolwək min rəha nəniəkisən wi rəha nasituən itəm Uhgin təmən. Nəniəkisən wi əh təsis-pənən e Lou itəm kəməte, məto təmisi-pən e Narmin Rəha Uhgin, məto-inu Lou itəm kəməte tatol məmə netəmim koatuwin o nimisən, məto Narmin Rəha Uhgin tatos-ipa nəmegəhən.

Nəhag-əhagən rəha Nəniəkisən Wi Rəha Nasituən

⁷ Otətəlig-in-tu. Nian Uhgin təməte Lou e kəpiel, mos-ipən kəm Moses, nəhag-əhagən əh-ikin rəha Uhgin, kən nəhag-əhagən əh təmalpin niganəmti Moses, kən netəm Isrel okol kəsotəplanən niganəmtin, nat əpnapin nəhag-əhagən tinateiuaiu. Kən okəmə wək rəha Lou in suatip itəm tatuwin o nimisən, məto in təhag-əhag, ⁸ kən wək rəha Narmin Rəha Uhgin otəhag-əhag pik. ⁹ !Okəmə wək itəm kəmakil netəmim məmə otəkəike motimis, in tatəhag-əhag, kən wək itəm tatol netəmim kotətuatip e niganəmti Uhgin, in tatəhag-əhag pik agin! ¹⁰ Nipahrienən, nəniəkisin

* **3:3:** Nian Pol tatəghat e nəghatən “kəməsəte-pənən e kəpiel epin-epin,” tatəghat e Lou itəm Uhgin təmos-ipən kəm Moses, kən Moses təməte e kəpiel. **3:3:** Eks 24:12; Jer 31:33; Esik 36:26-27

3:4: Wək 20:31 **3:6:** Jer 31:31; Jon 6:63; 1 Kor 11:25 **3:7:** Eks 34:29 **3:9:** Dut 27:26; Rom 1:17

oas rəha nasituən itəm təməhag-əhag aupən, roiu in təsəhag-əhagən, məto-inu nəniəkis-in wi itəm təhag-əhag pik agin, tinaprəkis-in itəm aupən. ¹¹ ! Kən okəmə wək rəha Lou itəm otəpanikə, tinuwa e nəhag-əhagən, kən wək rəha Narmin Rəha Uhgın itəm otatig lilin, tatəhag-əhag pik agin-əh!

¹² Tol nəhlan, məto-inu emotələhəu-pən əskasik rəhatimat nətəligən e wək əh rəha Narmin Rəha Uhgın, nətəligən rəhatimat təskasik e Uhgın, kən məsotəginən o nən-iarəpən rəhan nəghatən.

¹³ Itimat esotahmenən e Moses, itəm təmətalpin niganəmtin e niməhan agege məmə netəm Isrel okəsotəplanən məmə nəhag-əhagən teiuaiu muwin mikə. ¹⁴ Məto Uhgın təmol nətəligən rəhalat tiəkis. Kən mətoarus-pa əh-roiu, niməhan əh tətəhtosig-in nətəligən rəhalat nian kotafin Naoa Rəha Nəniəkisən Oas.† Uhgın təsos-irəkisən əh niməhan əh, məto-inu tatos-irəkis əm e Kristo.

¹⁵ Əwəh, mətoarus-pa əh-roiu ne, nian kotafin Lou rəha Moses, niməhan kit tatəfətain nikilat. ¹⁶ Məto okəmə etəmin pah təuhlin mətag-pən o İərəməərə, niməhan əh otiet rəkis. ¹⁷ Otətəlig-in-tu, İərəməərə əh, in Narmin. Kən ikin Narmin rəha İərəməərə tətətig ikin, in tatikis kitat. ¹⁸ Kən kitat, itəm kəsəfətainən niganəmtitat e niməhan, koatəplan nəhag-əhagən asol rəha İərəməərə, kən netəmin koatəplan nəhag-əhagən əh e nəmegəhən rəhatat. Kən in tatəuhlin nəmegəhən rəhatat məmə okotuwa kahmen lan e nəhag-əhagən itəm

3:11: Luk 22:31 **3:12:** Wək 14:27; 1 Kor 16:9 **3:13:** Eks 34:33 † **3:14:** “Naoa Rəha Nəniəkisən Oas” in “Oltesteman.”
3:16: Eks 34:34 **3:17:** Jon 8:36; Rom 8:2

rəhan nəsanənən tatər tatər. Kən nəhag-əhagən əh təmisi-pən o İəramərə itəm in Narmin Rəha Uhgın.

4

Nat keike e kípəhau oas

¹ Tol nəhlan, nikitimat təsəpouən o wək u məto-inu itimat emotos e nasəkitunən rəha Uhgın. ² Məto e nolən rəhatimat esotegəhan-inən nolən itəm tatəhluaig ne nolən aulis min. Ko esoteiuəən məsotəuhlinən nəghatən rəha Uhgın. !Kəp! Məto itimat ioatən ətuatip əm nípahrienən, kən e nolən əh, e niganəmti Uhgın, emotol-arəp e niganəmti netənim rafin məmə rəhatimat nolən in tətuatip. ³ Kən okəm-naka namnusən təwir itəm ekoatən-iarəp in tatəhluaig o netənim neen, məto kəp, tatəhluaig əm o netənim itəm koatətəu-pən suatip o nuwınən e nigəm asol. ⁴ Koatətəu-pən suatip əh məto-inu Setan, u in İərmis itəm tatəramərə e nətueintən u, təməfətain nətəligən rəhalat, məmə kəsotəplanən nəhag-əhagən wir rəha namnusən təwir itəm tatuəp mətəsiəgəpın ilat. Nəhag-əhagən əh təmisi-pən e Kristo. Kən nian kitat koatəplan Kristo, kən kitat koatəplan məmə Uhgın in tahro nulan. ⁵ Itimat esotən-iarəp atipən itimat, məto ioatən-iarəp İesu Kristo məmə in İəramərə, kən itimat iolwək min rəhatəmat o nərgi İesu. ⁶ Tol nəhlan məto-inu Uhgın u təmən məmə, “Pəs nəhag-əhagən tuəp masiəgəpın ikin tapınəp ikin,” in təmasiəgəpın e nikitat məmə kitat kotitun nehmən nəsanənən, ne nepətən əhag-əhag rəha Uhgın, kən kitat koatehm natimnat min əh e niganəmti Kristo.

4:2: 2 Kor 2:17; 1 Tes 2:5
Jen 1:3; Aes 9:2; 2 Kor 3:18

4:4: Efes 2:2; Kol 1:15; Hip 1:3

4:6:

⁷ Məto kitat koatos nat keike əh e kipəhau oas, inu nipətitat. Tol nəhlan məmə otəgəhun məmə nəsanənən wir əh taprəkis, təmisi-pən e Uhgin, təsisi-pamən otat. ⁸ Nəratən tepət koatıləs pıkən itimat e suatip min rafin, məto təsərəkınən itimat. Nian neen ekotəruru suatip, məto es-otapəsən nalkutən. ⁹ Netənim koatol nəratən kəm itimat, məto Uhgin təsapəsən itimat. Koatoh itimat, məto kəsotərəkınən itimat. ¹⁰ İkin pəhrüən ioatuwin ikın, katohamnu nipətitimat tahmen e kəməhamnu İesu. Tol nəhlan məmə, netənim okotəplan nəmegəhən rəha İesu e nipətitat. ¹¹ Kən itimat itəm ekoatəmegəh, nian rafin kategəhan-in itimat məmə ekotimis o nərgi İesu. Tol nəhlan məmə netənim okotəplan rəhan nəmegəhən e nipətitat itəm otəpanimis nian kit. ¹² Kənu, nian rafin itimat ioatıləs pıkən nimisən məmə itəmat onəkotitun nəmegəhən itulin.

¹³ Naə Rəha Uhgin tatən məmə, “Emahatətə, kən tol nəhlan ekatən.” Kən e nolən kitəh əm rəha nahatətən, itimat min ekotahatətə, kən tol nəhlan ekoatən, ¹⁴ məto-inu itimat ekotitun məmə, etəm təmol İərəmərə İesu təmegəh min e nimisən, in otol itimat ne itəmat, kitat rafin kotəmegəh min e nimisən kitat İesu, kən məf-iarəp kitat e niganəmtin. ¹⁵ Natimnat rafin u o nəwırən rəhatəmat, kən nian nəwırən rəha Uhgin tatiuw-pa netənim tepət təhmin min okotuwa o Kristo, kən okotos-ipən nənwıwıən tepət kəm Uhgin, kən okotıləs-ipər nərgin ilis ilis agin.

4:7: 2 Kor 5:1

4:8: 2 Kor 1:8; 7:5

4:10: 1 Kor 15:31

4:11: Rom 8:36

4:13: Sam 116:10

4:14: 1 Kor 6:14

¹⁶ Tol nəhlan, nikitimat təsəpouən. Nat əpnəpən məmə nıpətitat tateiuaiu roiu, məto Uhgın tatol nikitimat tatuwiwi nian rafın. ¹⁷ Tol nəhlan məto-inu, nəratən itəm koatatig lan, ilat nat əpnəpən əm, kəsotatigən tuwəh. Məto noalat in nəhag-əhagən wir itəm otətatig lili, kən in təwir məfigəm taprəkis-in ilat. ¹⁸ Kən tol nəhlan, niganəmtitə kəsotətulən e nat itəm katəplan, məto koatətul e nat itəm kəsəplanən, məto-inu nat itəm katəplan in nat rəha roiu əm, otəpanikə, məto nat itəm kəsəplanən in namnun tikə.

5

Nıpətin wi əpəh e nego e neai

¹ Tol nəhlan, kotitun məmə nıpətitat in tahmen e nimə tapolən itəm kitat kotatig lan ikin-u e nətueintən, kən nian kit otəmnəmit mərat. Kən nian nimə tapolən əh tikə e nətueintən, məto əpəh e nego e neai, rəhatat nimə wi əh-ikin itəm sənəmə etənim təmol, məto Uhgın əm təmol, nıpətitat wi itəm otatig lili. ² Məto roiu e nıpətitat rəha nətueintən, koatəhg nikitat, kən kətolkeike pik məmə nian otatuwa itəm kitat okotuwin e nıpətitat wi rəha nego e neai, tahmen e kitat koatuwin e natimnat wi. ³ Tol nəhlan məto-inu sənəmə kitat okotuwa narmin əm nıpətin tikə, məto okotos nıpətin wi rəha nego e neai. ⁴ Nıpətitat itəm otimis tol kitat koatekimis moatehag rəha nəpouən, məto sənəmə koətolkeike məmə okotimis kən nıpətitat otikə, kəp. Məto kitat kətolkeike məmə okotuwin e nıpətitat wi məmə nəmegəhən lili otəwiək

4:16: Efes 3:16

4:17: Rom 8:17-18

4:18: Kol 1:16

5:1:

2 Kor 4:7

5:2: Rom 8:23

nīpətītāt rəha nətueintən itəm otimis. ⁵ Kən Uhgin pisin əm təmol kitat o natimnat min əh, kən təmos-ipa Narmin Rəhan məmə otəgətun wir kəm kitat məmə rəhan nəniəkisən min otuwa pahrien.

⁶ Kən tol nəhlan, nətəligən rəhatat təskasik, kən kitat kotitun wir məmə nian koatos əm nīpətin rəha nətueintən u, kitat koatətul əh ihluə imə ləramərə ikin rəhatat. ⁷ Kitat kotatig e nətueintən e nahatətəən e Uhgin, sənəmə e natimnat itəm koatəplan. ⁸ Iatən məmə nətəligən rəhatat təskasik, kən kotolkeike məmə kotapəs nīpətītāt motuwın e nimə wi rəhatat kitat ləramərə. ⁹ Tol nəhlan, okəmə kotatig e nīpətītāt, o okəmə kotapəs nīpətītāt rəha nətueintən, kitat kotalkut pik məmə kotol natimnat itəm koatol niki ləramərə tagien. ¹⁰ Kotol nəhlan məto-inu kitat rafin okotəkəike motətul aupən e Kristo məmə in otakil rəhatat nolən min, kən kitat kitiah kitiah okotos nətouən tətəu-pən natimnat itəm kəmotol e nətueintən, okəmə nat təwir o nat tərət.

Ien əhruin min rəha Uhgin

¹¹ Kən roiu əh, məto-inu ekotisiai-in ləramərə, kən motalkut məmə ekotiuw-pa netənim. Uhgin titun itimat ne wək rəhatimat, kən ekotolkeike məmə itəmat min onəkotitun wir itimat. ¹² Esotolkeikeən məmə ekotiləs-ipər itimat e niganəmtitəmat, məto ekotos-ipinə rəhatimat nətəligən məmə okəm-naka nikitəmat otagien otimat. Kən roiu, nəkotitun nuhalpınən nəghatən rəha netənim itəm kotausit o nolən itəm netənim koatəplan, məto nikilat təsəhtən nat itəm tətətig

5:6: Hip 11:13-16

5:8: Fil 1:23

5:9: Kol 1:10; 1 Tes 4:1

5:10: Pri 12:14

e niki etəmim. ¹³ Okəmә itimat ialmәl mīn, mәto o nәrgi Uhgīn. Kәn okәмә rәhatimat nәtәligән tәtuatip әm, in nat kit itәм otasitu etәmat.

¹⁴ Tol nәhlan mәto-inu, nolkeikeән rәha Kristo tatәrәmәrә etimat, mәto-inu itimat ekotitun wīr mәмә suah kitīәh әm tәmimis o netәmim rafin, kәn tol nәhlan, netәmim rafin kinotimis.

¹⁵ Kәn tәmimis o netәmim rafin mәмә ilat itәм koatәmegәh, okotapәs nolән natimnat itәм ilat әm kotalkeike, mәto ilat kotәkәike motol nolән mīn itәм Iesu tolkeike, u etәм tәmimis olat kәn mәmegәh mīn e nimisән.

¹⁶ Tol nәhlan, roiu ne, itimat esotakilән netәmim e nolән itәм netәmim rәha nәtueintән kotakil netәmim lan. Nat әpnapīn nian kit emotakil Kristo e nolән әh, mәto roiu esotolән. ¹⁷ Tol nәhlan, okәмә suah kit tәmuwa kitīәh ilau Kristo, in tәmuwa etәmim wī. !Nat oas tәmīkә, kәn nat wī tinuwa!

¹⁸ Natimnat rafin mīn әh tatisi-pән e Uhgīn. Aupән kitat tikimīr mīn kitat Uhgīn, mәto e Kristo, in tәmәmīk kitat kotuwa iuәhkīr ron, mol kitat iolīn mīn. Kәn tәmos-ipa kәм itimat wәk u rәha niuw-pamән tikimīr mīn rәha Uhgīn okotuwa iolīn mīn. ¹⁹ Inu tatән mәмә Uhgīn tәmiuw-pa rәhan tikimīr mīn e nәtueintән mәмә okotuwa iolīn mīn e Kristo, kәn mәsafin mīnән rәhalat nolән rat mīn. Kәn tәmos-ipa kәм itimat nәghatән u rәha niuw-pamән tikimīr mīn rәhan okotuwa iolīn mīn.

²⁰ Tol nәhlan, itimat ien әhruiн mīn rәha Kristo, kәn tahmen mәмә Uhgīn tәtaun-in netәmim e nәwiatimat. Kәn ioatәtapәh әskasik otәmat e nәrgi Kristo mәмә: nakotapәs nolә tikimīr, kәn motuwa

5:14: Hip 5:9

5:15: Rom 14:7-8

5:17: Rom 8:1; Kal 6:15

5:18: Rom 5:10

5:19: Rom 3:23-25

ioli Uhgîn mîn. ²¹ Uhgîn tæmol suah u itəm rəhan nolən rat tîkə, məmæ in sakrifais rəha nolən rat mîn rəhatat, məmæ e in, kitat okotətuatip e nîganəm̃ti Uhgîn.

6

¹ Məto-inu itimat ioatol wək kitîəh itimat Uhgîn, ekotətapəh əskasik otəmat məmæ nian Uhgîn tətawte-in rəhan nəwîrən kəm itəmat, nəsotosən tahmen in nat əpnəpîn əm, ² məto-inu Uhgîn tatən məmæ,

“E nian ətuatip, eməto ik,

kən e nian rəha nosmegəhən, emasitu lam.”

Iakən kəm itəmat, məmæ roiu, in nian ətuatip rəha Uhgîn, roiu in nian rəha nosmegəhən.

Nian əskasik mîn e nəmegəhən rəha Pol

³ Esotolən nat kit itəm suah kit otəme lan e rəhan nahatətəən, məto-inu esotolkeikeən məmæ okəsən ratən wək rəhatimat. ⁴ Məto nolən mîn rafin e nəmegəhən rəhatimat koatəgətun məmæ itimat iolwək mîn pahrien rəha Uhgîn: itimat ekotətul əskasik e nian rəha nəratən, ne nian iəkis mîn, ne nian itimat ekotəto tərat. ⁵ Netənim kəmotəh itimat, kən kəmki-pən itimat e kalapus, kən katitəp itimat məmæ okoh itimat. Emotol pik wək, məsotapılən lapin, kən nəumis tus itimat. ⁶ Esotolən nolən kit itəm tatol nikitimat tamkimik, itimat ekotenatig, nətəligən rəhatimat kaifəməh, ekotol təwîr kəm netənim, Narmin Rəha Uhgîn tatər e nikitimat, kən ekotolkeike netənim e nolkeikeən pahrien. ⁷ Ekoatən əm nîpahrienən, kən nəsanənən rəha Uhgîn tətətig

etimat. Rəhatimat nolən ətuatip in tahmen e natimnat rəha nəluaginən o nohən ne nətlosigən. ⁸Netənim neen koatisiai-in itimat, neen koatehm-əhau itimat, neen koatən rat itimat, neen koatən wir itimat, neen koatən məmə itimat ekoateiuə məmə itimat iolwək min rəha Uhgın, məto itimat iolwək min pahrien rəhan. ⁹Netənim neen kəsotegəhan-inən məmə itimat aposol min pahrien, məto netənim tepət koatən məmə itimat aposol min pahrien. Nian rafin nimisən tatitəp itimat, məto ekoatəmegəh əh. Katoh itimat, məto kəsohamnuən əh itimat. ¹⁰Nikitimat təpou, məto nian rafin ekotagien əh. Rəhatimat nautə tikə, məto itimat ekotol netənim tepət rəhalat nautə tepət. Rəhatimat nat kit tikə, məto ekoatos natimnat rafin.

¹¹Piak min əpəh Korin, emotən rafin nəghatən kəm itəmat kəsapəsən kit, kən ekotolkeike itəmat e nikitimat rafin. ¹²Itimat esotahtosig-inən nolkeikeən rəhatimat otəmat, məto itəmat notahtosig-in rəhatəmat otimat. ¹³Roiu əh, iatəghat kəm itəmat məmə itəmat nenətik ətuatip. Tətuatip əm məmə itəmat min, nakotolkeike itimat e nikitəmat rafin.

¹⁴Sotənən kəm netəm kəsotəfakən məmə nəkoatol wək kit itəmat min ilat. ?Nolən ətuatip ne nolən tərət kiatur nol kələhən nat kit? ?O, nəhag-əhagən ne napinəpən kiatur nuwamən məpələh kələh muəghat? !Kəp! ¹⁵Kən e nolən kitiah əm, Kristo ne Setan, okol kəsuanən nəghatən kitiah nian kit. ?İəfak ne etəm təsəfakən kiatur nolən nat e nətəligən kitiah? !Kəp! ¹⁶E Nimə Rəha Uhgın,

ikin kit tikə əh-ikin o narmi nat min, məto-inu kitat u Nimə Rəha Uhgın itəm tatəmegəh. Kən Uhgın təmən məmə,

“Ekatig itimat min ilat,
kən maliwək itimat min ilat,
kən ekuwa io Uhgın rəhalat,
kən ilat okotuwa rəhak netəmin.”

¹⁷ Kən İərəmərə təmən məmə,
“Tol nəhlan, otiet rəkis elat, motan isəu olat.
Kən məsotekən nat itəm tamkimik e niganəmti
Uhgın,

kən nikik tagien məmə ekos itəmat.”

¹⁸ “Kən ekuwa rəhatəmat tata,
kən itəmat onəkotuwa nenətik min,” inu nəghatən
rəha İərəmərə itəm in ilis agın.

7

¹ İolik min. Nəniəkisən min u rəhatat. Kən tol nəhlan, pəs kotafəl nikitat, motos-irəkis natimnat rafin itəm koatol nıpətitat ne narmitat kotamkimik. Kən pəs kotələhəu kalın kitat məmə rəha Uhgın əm motətəu-pən rafin suatip itəm nikin otagien lan.

Niki Pol təmagien olat

² Oterəh e nikitəmat kəm itimat. Esotolən tərəat kəm suah kit, esotiuw-pənən suah kit tərəat ikin, esotalkutən məmə ekotos nat kit rəhatəmat e nolən eko-eko. ³ Esənən nəghatən u məto-inu nəmotol nolən rat. Emən rəkis kəm itəmat məmə eko-tolkeike pik itəmat nian rafin, kən nat əpnəpin nimisən o nəwirən otuwa e nəmegəhən rəhatimat,

6:16: Lev 26:12; Esik 37:27; 1 Kor 3:16 **6:17:** Aes 52:11; Esik 20:34,41; Nöl Əpən 18:4 **6:18:** 2 Saml 7:14; 7:8; Jer 31:9

məto itəmat əpəh imə e nikitimat. ⁴ Io etahatətə əskasik etəmat. Iatausit otəmat. Itəmat nəmotiləs-ipər pik rəhak nətəligən. Emos nəratən tərət təmuwa e rəhak nəmegəhən, məto nīkik tagien maprəkis otəmat.

⁵ Tol nəhlan məto-inu, nian emotuwa Masetonia, esotamegən, məto nian rafin, nəratən tatiləs itimat təmisi-pən ikin pisin pisin min. E nəmegəhən rəhatimat, netənim kəmotəmou motol nəratən kəm itimat, kən itimat ekoatəgin. ⁶ Məto Uhgīn tatol kepīn netənim itəm nətəligən rəhalat tərəpou, kən təmol kepīn itimat e nuwamən rəha Taetas.

⁷ Kən sənəmə e nuwamən əm rəhan itəm təmol nikitimat tagien, məto e nəghatən wīr rəha nol kepīnən itəm nəmotən-ipən kəm in. In təmən-ipa kəm itimat məmə itəmat nakotolkeike pik məmə nəkotəplan io, kən təmən məmə nikitəmat tatəto tərət o nəghatən rəhak, kən təmən məmə nakolkeike pik io moatətul əskasik o nərgək. Nian eməto, nagienən e nīkik təmər mərīoah.

⁸ Nat əpnapīn okəmə rəhak naoa aupən təmol itəmat nakotəto tərət, məto esətoən tərət ron. Məto aupən, eməto tərət ron, məto-inu eməplan məmə naoa u təmol itəmat nakotəto tərət, məto rəha nian əkuəkīr əm. ⁹ Məto roiu, nīkik tagien, kən sənəmə məmə nəmotəto tərət, kəp. Nīkik tagien məmə nian nəmotəto tərət, nəmotəuhlin itəmat e rəhatəmat nolən rat min. Nīpahrienən, Uhgīn tolkeike məmə kitat okotəto tərət o nolən tol min-nulan. Kən məto-inu nəmotəuhlin itəmat, kən natimnat itəm emotən aupən kəm itimat təməsolən məmə nəmotakīəh e rəhatimat nahatətəən.

¹⁰ Kən nian koatəto tərət e nolən itəm Uhgín tolkeike, kən kotəuhlin kitat e rəhatat nolən rat, kən Uhgín tatosmegəh kitat. Kən nikitat otəsəpouən o nolən əh. Məto nian koatəto tərət e nolən rəha nətueintən, tatiuw-pən kitat e nīmīsən. ¹¹ Otəplan-tu nəmegəhən rəhatəmat nian nəmotəto tərət e nolən itəm Uhgín tolkeike. Nolən əh, noan tepət: nakotolkeike motalkut əskasik məmə nəkotol nolən ətuatip, kən motoalkut əskasik məmə nokotəg-ətuatip-in rəhatəmat nolən rat mīn, kən motətəhau nolən rat mīn, kən narmitəmat təmiwig nəmotaut motəgin nolən rat mīn. Nəmotolkeike məmə nəkotəplan mīn io, kən nakotolkeike pīk məmə nakotətul əskasik o nərgək. Kən nəmoatətul matip məmə nəkotol nalpīnən kəm netəm kotol nolən rat. E nolən mīn rafin rəhatəmat, nəmotəgətun məmə nəsotolən nat kit tərət e natimnat u. ¹² Kən eməte naoa u kəm itəmat, məto esətəən o suah u itəm təmol nolən rat, kən esətəən o suah u itəm in təmərəkin. Kəp. Eməte ilə məmə itəmat onəkotəplan əsas e niganəmti Uhgín məmə nəkoatətul əskasik o nərgitimat. ¹³ Natimnat rafin mīn əh koatiləs-ipər nətəligən rəhatimat.

Sənəmə itimat əm itəm nəmoatiləs-ipər nətəligən, məto nikitimat tagien pīk o Taetas, məto-inu nīkin tagien məmə nəmoatiləs-ipər mīn nətəligən rəhan. ¹⁴ Emən-ipən kəm in məmə etausit pīk otəmat, kən itəmat nəməsotolən io ekaulis. Natimnat rafin itəm emotən kəm itəmat, ilat nīpahrienən. Kən e nolən kitiah əm, natimnat rafin itəm emotən kəm Taetas etəmat, kən motausit ron, ilat mīn nīpahrienən.

15 Taetas, nikin tatəht əh məmə itəmat rafin agin-əh nəmotol nəwian, kən moatəgin moatasiəp nian nəmotegəhan-in məmə otuwa məplan itəmat. Kən nian nikin tatəht natimnat min əh, nolkeikeən rəhan otəmat tatər təhmin min. 16 Nikik tagien pik məto-inu etahatətə əskasik etəmat məmə nəkoatol naka itəm tətuatip.

8

Pol təmatapəh məmə okotawte

1 Piak min ne winik min, ekotolkeike məmə nəkotitun nəwiran rəha Uhgın itəm təmawte-in kəm niməfak min əpəh Masetonia məmə ilat kotitun nasituən e netəmin neen min. 2 İlat kəmotatig e nəratən asol kit ne nian əskasik min, kən nat əpnəpən ilat nan rat rəhalat nautə tikə agin, məto nəmegəhən rəhalat tərıoah wir e nagiənən. Kən nan ratən ne nagiənən kəmuoe-in nolən təwir. E nolən əh, kəmotərakin məni tepət motos-ipən kəm iəfak min əpəh ikin min. 3 İatən-iarəp kəm itəmat məmə ilat kəmosipən tepət, taprəkis-in itəm netəmin nikilat təht məmə okol kəsotolən. Kən ilat atip kəmotol. 4 Kəmotətapəh amul otimat məmə itimat ekotegəhan pəs ilat kotasitu e wək rəha nos-ipən məni kəm iəfak min əpəh Jerusalem. 5 Kəmotəupən kos-ipən nəmegəhən rəhalat kəm İərəməyə, kən uarisig, kəm itimat, e nolən itəm Uhgın tolkeike. Nikitimat təsəhtən məmə okotol tepət nəhlan, məto kəmotol.

6 Kən tol nəhlan, emotuəh niki Taetas məmə otitəlig-pinə otəmat. In təmaupən məghat kəm itəmat o nolən nat u, kən tol nəhlan, emotətapəh

məmə in otəghat kəm itəmat məmə nəkotol namnun wək wır rəha nawteən əh itəm nəmotətuoun.
⁷ E natimnat min u rafin, itəmat nəmotol təwir pik maprəkis, inu nahatətəən rəhatəmat, ne nəghatən rəhatəmat, ne nitunən rəhatəmat, ne nolən rəha nətul əskasikən, ne nolkeikeən rəhatəmat otimat. Kən roiu, iakolkeike məmə nəkotol wək kit min e nolən təwir pik maprəkis, inu wək wır rəha nawteən.

⁸ Esənən məmə nəkotəkəike motol. Məto emotəgətuon kəm itəmat məmə netəm pisin pisin min nikilat tagien o nasituən e wək əh. Kən roiu əh, iakolkeike məmə ekisilu wır məmə nolkeikeən rəhatəmat in nıpahrienən tahmen elat, o kəp.
⁹ Itəmat nəkotitun wır nəwırən rəha İərəməərə İesu Kristo itəm təmawte-in kəm itəmat, məmə nat əpnəpın rəhan nautə tepət, məto təmol otəmat məmə in rəhan nautə tikə. Kən məto-inu təmol məmə rəhan nautə tikə, kən mol itəmat rəhatəmat nautə tepət.

¹⁰ Kən inu rəhak nətəligən e natimnat min u, itəm otasitu etəmat. Otol namnun e wək itəm nəmotətuoun e nup uarisig. Nikitəmat təmaupən məht məmə nəkotol wək əh, kən itəmat nəmotaupən motətuoun motol. ¹¹ Tol nəhlan, roiu otol namnun wək u rəha nos-ipənən. Kən rəhatəmat nətəligən o nolən wək u itəm nako-tolkeike pik məmə nəkotol, in otuwa nıpahrienən, kən itəmat onəkotol e rəhatəmat atip natimnat.
¹² Okəmə nikitəmat tagien o nos-ipənən, kən Uhgın nikin tagien o nosən natimnat əm itəm nakoatos moatos-ipən. Kən in təsətapəh-inən natimnat itəm

tikə otəmat.

¹³ Esotolkeikeən məmə nəmegəhən rəha netəmim neen otimətig məto-inu kəmos rəhatəmat məni, məto nəmegəhən rəhatəmat in otiəkis məto-inu nəmotasitu elat. Kəp. Iakolkeike məmə tahmen-ahmen əm otəmat rafin. ¹⁴ Roiu, itəmat nakoatos tepət kən motitun nasituən elat. Kən o nian min neen, ilat kotitun noorən kəm itəmat okəmə rəhatəmat tikə. Kən itəmat nakotahmen-ahmen əm, ¹⁵ tahmen e itəm Naoa Rəha Uhgin tatən məmə,

“Netəmim itəm kəmotəulək tepət, tahmen əm, təsaprəkisən.

Kən netəmim itəm kəmotəulək noan-məsin, rəhan nagwənən tahmen əm, təsikəən.”

Taetas təmuwin Korin

¹⁶ İatənwiwi Uhgin məmə təmələhəu-pən e niki Taetas nətəligən o nasituən etəmat, tahmen-ahmen e rəhak. ¹⁷ Tol nəhlan məto-inu Taetas, nikin tagien o nımnəən məplan itəmat tahmen e itəm emən kəm in. Kən taprəkis-in itəm əh, nikin tagien pik o nasituən etəmat, kən in rəhan əm nətəligən məmə in otimnə məplan itəmat. ¹⁸ Kən itimat ekotahl-ipinə min piətət kit min timnə ilau min. Suah u, netəm e niməfak min koatisiai-in o rəhan wək o nən-iarəpən namnusən təwir. ¹⁹ Kən taprəkis-in inu, niməfak min kəmotitəpun məmə otuwa itimat min o niləsən məni u muwin əpəh. Kən itimat ekotərəməyə lan o noorən məmə otıləs-ipər nərgi İərəməyə, kən matəgətun məmə nikitimat otagien pik o nasituən. ²⁰ Itimat esotolkeikeən məmə suah kit otən rat itimat o nolən rəha noorən

məni asol əh. ²¹ Tol nəhlan, itimat ekotalkut pik məmə ekotol nat itəm tətuatip, məto sənəmə e niganəmti İerəmərə əm, məto e niganəmti netəmim min.

²² Kən ekotahl-ipinə piətət kit min iləhal suah mil u. Suah əh, e wək tepət ne nolən tepət, emotisilu wir məmə in tolkeike pik məmə otasitu. Kən roiu, in tolkeike pik məmə otasitu məto-inu in tətahatətə pik etəmat. ²³ Kən o Taetas, itimlau min ekioal wək kitəh əm, kən in min tatol wək e nikitəmat o nasituən etəmat. Kən o piətət min, ilat ien əhrui rəha niməfak min, kən nolən wir min e nəmegəhən rəhalat koatisiai-in Kristo. ²⁴ Tol nəhlan, otol rəhatəmat nolən kəm suah miləhal əh məmə nako-tolkeike pahrien iləhal, kən iləhal okəhalitun o nat naka itimat ekotausit otəmat. Kən otol-wir kəm ilat məmə niməfak min okotəplan.

9

¹ Okəmə esəteən naoa u kəm itəmat, in təwir əm məto-inu nəkotitun rəkis wək u rəha nasituən e iəfak min əpəh Jerusalem. ² İatən nəhlan məto-inu io ekitun məmə nakotolkeike məmə onəkotasitu. Kən ematıləs-ipər nolən wir rəhatəmat o netəm Masetonia, matən kəm ilat məmə e nup itəm tinuwın rəkis, itəmat əpəh Akaea, nəmoatətul matip o nos-ipənən. Kən nian kəmotəplan məmə nikitəmat tagien pik o nasituən, təmol min ilat tepət kotolkeike məmə okotasitu min.

³ Məto roiu, etahl-ipinə piətət miləhal u məmə iləhal okəhaləplan itəmat məmə itəmat onəkotol nat itəm nəmotən, təhmen əm məmə emən mihin, kən tol nəhlan rəhatimat nəghatən o niləs-ipərən

nolən wir rəhatəmat, sənəmə nat əpnəpən əm.
⁴ Məto okəmə nəsolən, kən nian ekimnə itimat
 netəm Masetonia neen, kən okotəplan məmə
 itəmat nəsolən əh, kən nolən əh otol itimat eko-
 taulis, məto-inu itimat enoatiləs-ipər rəkis itəmat.
 Kən otol itəmat nakotaulis taprəkis. ⁵ Tol nəhlan,
 nīkik təht məmə ekəkəike mətapəh o piətət miləhal
 məmə okotimnə rəkis pitən kəplan itəmat, kən
 motol namnun wək o nəmki-pamən mənī asol
 itəm nəmotən-iəkis məmə nakotos-ipən. Məto
 iakolkeike məmə in nos-ipənən kit itəm tatisi-pən
 atip e nikitəmat, sənəmə suah kit tatəkəike kəm
 itəmat məmə nakotos-ipən.

Nolən nawteən

⁶ Sotaluinən nat u. Etəm tatəfe noan məsin,
 matəulək-in noan məsin. Kən etəm tatəfe tepət,
 matəulək-in tepət. ⁷ Itəmat kitiah kitiah nakəkəike
 mos-ipən nat naka nəmən e nīkim məmə nakos-
 ipən. Okəmə nīkim təsagienən ron, təsəwirən
 məmə nakos-ipən. Kən okəmə nakos-ipən məto-
 inu suah kit tatəkəike kəm ik məmə nakos-ipən,
 in min təsəwirən. Ekən nəhlan məto-inu Uhgīn
 tolkeike etəm u tatos-ipən e nīkin pahrien. ⁸ Kən
 Uhgīn titun nawte-inən nəwirən rafin agin kəm
 itəmat məmə e nian rafin e natimnat rafin, nako-
 tos natimnat rafin itəm tətutəp məmə nəkotəkəike
 motos, kən moatos tepət min əh-ikin məmə nako-
 toor kəm netənim. ⁹ Naoa Rəha Uhgīn tatən məmə,
 “In tatoor rəhan natimnat tepət kəm ian-rat min,
 kən rəhan nolən ətuatip tətətig lilin.”

¹⁰ Kən Uhgin itəm tatos-ipən nīkuti nat o etəm tatəfe, kən matos-ipinə pīret o nunən, e suatip kitiaħ əm in otos-ipinə nat tepət kəm itəmat mōl in tepət mīn mēmə, itəmat nəkotitun nasituən e netəmim neen mīn, kən in otol noan tepət itəm tāmisi-pən e nolən ətuatip rəhatəmat. ¹¹ E natimnat rafin e nəmegəhən rəhatəmat, Uhgin otos-ipən rəhan nəwīrən kəm itəmat mēmə itəmat nəkotitun nawteən e nian rafin. Kən nian ekotoor rəhatəmat nasituən, netəmim okotənwiwi Uhgin ron.

¹² Wək u itəm itəmat nəkotol, tatos-ipən mēni o nagwənən kəm netəmim rəha Uhgin u nəumis tatus ilat, mətō tatol nat wīr kit mīn taprəkis, inu nənwiwiən itəm tāmər marioah e nīki netəmim matuwīn o Uhgin. ¹³ Nian nəkotol wək u, natol-arəp nolən rəhatəmat kəm netəmim tepət. Kən ilat okotiləs-ipər nərgi Uhgin ron, mətō-inu itəmat nəkoatol pahrien nolən rəha netəmim itəm koatən nīpahrienən e namnusən təwīr rəha Kristo. Kən okotiləs-ipər nərgi Uhgin o nawteən rəhatəmat e mēni asol kəm ilat ne netəmim rafin. ¹⁴ Kən nian koatəfak otəmat, nīkilat tuwīn otəmat mətō-inu Uhgin tēmawte-in rəhan nəwīrən kəm itəmat taprəkis aɡin-əh mēmə nəmotasitu pīk elat. ¹⁵ !Pəs kotən kəm Uhgin mēmə nīkitat tagien o Nətin itəm təmos-ipa kəm kitat, u in nat təwīr aɡin maprəkis!

10

Pol təmuhalpin nəghatən e rəhan wək

¹ Io Pol, io atip, iatəkəike e nat kit kəm itəmat. Netəmim neen koatən mēmə nian kitat mīn itəmat, rəhak nətəligən in ləhau əm, mətō nian ekiet rəkis

etəmat, rəhak nolən təskasik pik. Kristo, in rəhan nətəligən ləhau, kən in etəm mətig. Kən e nolən kitiaḥ əm,² iatətapəḥ otəmat məmə, onəkotol nolən rəhatəmat tətətip məmə nian ekimnə, məsəhai pikən itəmat. Məto ekitun məmə ekəhai netənim neen u koatən məmə ekoatətəu-pən nolən rəha nətueintən u,³ məto-inu nat əpnəpin ekotatig e nətueintən u, itimat esotəluaginən e nolən rəha nətueintən u.⁴ Natimnat rəha nəluaginən itəm itimat ekoatəluagin lan, sənəmə nat itəm nətueintən koatəluagin lan. Kəp, natimnat rəhatimat, ilat koatos nəsanənən rəha Uḡin o nərəkinən ikin tiəkis o nuwinən ikin ima tikimir min.⁵ Itimat ekoatərakin nəghatən eiueiuə min ne nətəligən ausit min, ilat rafin itəm koatən-iəhau netənim o nitunən Uḡin. Nətəligən min rafin itəm tikimir min rəha Uḡin, itimat ekoatəluagin elat, motol win elat, motol məmə ilat rafin okotol nəwia Kristo.⁶ Kən nian itəmat nakotətəu-pən wir nəwia Kristo, itimat ekoatətul matip o nolən nalpinən kəm netənim rafin itəm koatəht nəwian.

⁷ Itəmat nakoatəplan nat itəm ihluə, məto nəkotəruru nṗətin. Okəmə suah kit titun pahrien məmə in etənim rəha Kristo, kən in otətəlig-in wir min məmə itimat min rəha Kristo tahmen lan.⁸ Nat əpnəpin iatəghat ausit məsin o nepətən itəm Iərəmə rə təmos-ipa, okol esaulisən ron. Təmos-ipa o niləkinən itəmat, sənəmə o niləs-iəhauən itəmat.⁹ Esolkeikeən məmə nikitəmat təht məmə ekəte naoa min kəm itəmat e nolən itəm netənim neen koatən, məmə otol itəmat

10:1: 1 Kor 2:3

10:2: 1 Kor 4:21

10:4: Efes 6:13-17

10:8: 2 Kor 13:10

nakotəgîn. ¹⁰ Ilat kotən rat io məmə, “Rəhan naoa təfigəm kən masilə, məto nian tətən kitat min, in sənəmə etəm əskasik kit, kən rəhan nəghatən in nat əpnapin əm.” ¹¹ Netəm tol nəhlan kotəkəike motitun məmə, nolən rəhatimat itəm koatəplan e naoa min emotahl-ipən nian itimat isəu, məto nian ekotimnə, ekotol rafin nolən min əh.

¹² Esotolkeikeən məmə ekotəplan ahmen itimat ne netəm pisin neen itəm koatiləs-ipər atip ilat. ! Kəsi, itimat esotahmenən! !Kəp, iatəsan əm! Nian ilat atip əm koatəplan ahmen ilat min, kən koatakil atip əm ilat min, tol rəhalat nitunən talməl.

¹³ Məto itimat, esotəghat ausitən taprəkis e nepətən rəhatimat, məto ekotəghat ausit e wək itəm Uhgîn təmələhəu-pən məmə rəhatimat, kən wək u, itəmat min əpəh ikin. ¹⁴ Kən nəghat ausitən e nepətən rəhatimat otəmat in ətuatip əm, in təsepət pikən.

Okəmə esotuwamən otəmat, okol esotəghatən nəhlan. Məto nipahrienən, emotaupən motuwa mətoarus-pa itəmat nian emotan moatən-iarəp namnusən təwir rəha Kristo. ¹⁵ Netənim neen koatəghat ausit o wək itəm suah pisin təmol. Məto itimat ekoatəghat ausit əm e wək itəm Uhgîn təmələhəu-pən kəm itimat. Itimat emotələhəu-pən əskasik nətəligən rəhatimat məmə nahatətəən rəhatəmat otəwiə təhmin min, kən tol nəhlan, rəhatimat wək e nikitəmat otol iahgîn mepət, ¹⁶ kən tol nəhlan, ekotitun nuwinən motən-iarəp namnusən təwir e ikin min e nikali imatəmat ikin muwin təhmin min. Kən e nolən əh, itimat esotolən wək e ikin kit itəm suah kit tinol wək rəkis ikin, kən məsotəghat ausitən o wək rəha etəm pisin. ¹⁷ Məto

Naoo Rəha Uhgin tatən məmə, “Pəs etəm tatəghat ausit, in otəghat ausit əm e natimnat itəm İərəməərə təmol.” ¹⁸ İatən nəhlan məto-inu, kəsisiai-inən etəmim itəm tatiləs-ipər atip in, məto kəsisiai-in əm etəmim itəm İərəməərə tatiləs-ipər.

11

Pol ne aposol eiueiua min

¹ İakolkeike məmə nakotegəhan-in io pəs ekən rəhak məsin nalmələn kəm itəmat. Məto pahrien, noatol rəkis. ² İatehm wir itəmat, məsolkeikeən məmə suah kit min otəmki-rəkis itəmat e nelmək, kən nolən əh rəhak təmisi-pən əm o Uhgin. Io tata rəhatəmat, kən itəmat nəkotahmen e pətan əkəku wi kit itəm kənən rəkis məmə okos rəham kətim kan məmə otətəu-pən suah kitiaə əm, nərgin u Kristo. Kən iatehm wir rəhak pətan əkəku əh məmə ekegəhan-in-pən in kəm rəhan iərman, kən in təruru əh iərman.

³ Məto iatəgin məmə onəkotahmen e İf itəm Setan təmeiua in e nəghatən ətehen. İatəgin məmə suah kit otiuw-pən rəhatəmat nətəligən tuwin ik pisin, kən nakotapəs rəhatəmat nolkeikeən o Kristo, itəm in tətuatip məpiə wir. ⁴ İatən nəhlan məto-inu okəmə suah kit tatuwa otəmat matən-iarəp İesu itəm tol pisin e İesu itəm ekoatən-iarəp, o okəmə itəmat nakoatos narmin itəm tol pisin e Narmin nəmos rəkis, o nakotəto namnusən təwir itəm tol pisin e itəm nəmos rəkis, məto itəmat ialmə min, nakotegəhan-in əm. ⁵ Aposol min əh itəm itəmat nakoatən məmə ilat “aposol min ilis

10:17: Jer 9:24; 1 Kor 1:31
5:26-27 **11:3:** Jen 3:4,13

10:18: 1 Kor 4:4
11:4: Kal 1:8-9

11:2: Efes

pik,” mato e rəhak nətəligən esəplanən məmə ilat ilis maprəkis-in io. ⁶ Okəmə naka kəsəgətun wirən io e nəghatən, mato ekıtun wir nəukətin namnusən təwir. İtımət emotəgətun nat əh kəm itəmat e nolən min rafin nian tepət.

⁷ Nian ematən-iarəp namnusən təwir rəha Uhgın kəm itəmat, esolən məmə nakotətou nat kit. Io atıp əm emos-iahau io o nıləs-ipərən itəmat. ?Kən tahro? ?Nolən əh in təfagə rat kit? !Kəp! ⁸ Nian ematol wək kitat min itəmat, niməfak min ik pisin kəmoatətou io. İuəhkir tahmen məmə emakləh-in ilat məmə ekasitu etəmat. ⁹ Kən nian kəmoatan, kən rəhak nat kit tikə, esətapəhən o suah kit o nasituən mato-inu piatat min itəm kəmotisi-pən Masetonia kəmos-ipa natimnat itəm rəhak tikə. Tol nəhlan, esətapəh-inən nat kit otəmat, kən məsos-ipənən wək əskasik otəmat o nehmən io, kən ekol nəhlan nian rafin. ¹⁰ Tahmen e nıpahrienən rəha Kristo tətətig lak, iatən pahrien məmə suah kit tikə ikin min rafin əpəh Akaea o nən-iahauən io o nəghat ausitən o nəsətapəh-inən nasituən. ¹¹ ? Kən tahro ekəsətapəh-inən nat kit otəmat, mato-inu esolkeikeən itəmat? !Kəp! Uhgın titun məmə ekolkeike pik itəmat.

¹² Netəmim neen kətolkeike məmə nikitəmat təht ilat məmə kotahmen etımat e wək itəm koatəghat ausit ron. Məto iakatakəike o nolən rəha nəsətapəh-inən natimnat məmə rəhalat nəghatən otiet morin. ¹³ Netəm nəhlan, ilat aposol eiueiuə min, kən koateiuə-in netəmim e wək rəhalat. !Kən ilat koatan tahmen məmə ilat aposol min pahrien

rəha Kristo, məto kəp! ¹⁴ Məto kəsotautən e nolən əh, məto-inu Setan atıp, tətən tahmen məmə in nagelo kit rəha nəhag-əhagən. ¹⁵ Kən sənəmə in nat kit itəm okotaut lan, okəmə iolwək min rəha Setan kotan tahmen məmə ilat iolwək min rəha nolən tətuatıp. E namnun nian, ilat okotos rəhalat nətouən tətəu-pən nolən min rəhalat.

¹⁶ Ekisimatıp min. Pəs suah kit tikə nikin təht məmə io ialməl. Məto okəmə nikitəmat təht nəhlan, kən otegəhan-in io pəs ekol nolən rəha ialməl məsin, kən ekəghat ausit məsin. ¹⁷ Nəghatən u rəhak sənəmə nat itəm İərəməyə təmən-ipa kəm io məmə ekən. Məto iatəghat əm tahmen e ialməl kit. ¹⁸ Netəmim tepət koatəghat ausit o nolən min rəha nətueintən, kən tol nəhlan, io min, ekəghat ausit. ¹⁹ !Ei! !Nakotenatig wır, kən tol nəhlan, motegəhan-in məmə iaməl min kotəgətun itəmat!*

²⁰ Nakotegəhan-in əm okəmə suah əpnəpın kit tatol itəmat slef, o okəmə tatos nat kit rəhatəmat e nolən eko-eko, o tatıləs-ipər atıp in, o tatem-pən nıganəmtitəmat. ²¹ !İataulis məmə nətəligən rəhatimat təpou pik məmə esotolən nolən rat min əh!

Rəhak nəghatən in talməl, məto nolən naka itəm netəm əh kotəmə okotəghat ausit ron, io min, ekəghat ausit ron. ²² ?Tahro? ?İlat koatən məmə ilat netəm Hipru? Io min. ?Koatən məmə ilat netəm İsrel? Io min. ?Koatən məmə ilat noanol rəha Epraham? Io min. ²³ ?Koatən məmə ilat iolwək min rəha Kristo? Io min, məto ekaprəkis-in ilat. Kəsi, iatəghat tahmen e ialməl kit. Emol wək

* **11:19:** E ves 19-21, Pol tatəghat əsan ilat. Nıpahrienən, in tatən-ıəhau ilat. **11:22:** Fil 3:5

pik taprækis-in ilat, kæn kiləs-ipən io e kalapus nian tepət taprækis-in ilat, kæn kəmalis io taprækis-in ilat, kæn iuəhkir ekimis nian tepət. ²⁴ Nian faif, noanol rəha Isrel kəmotalis io mau tate-nain. ²⁵ Nian kisil, kəmalis io e nikilkil. Nian kit kəmaht io e kəpiel apin. Nian kisil emuwin e nego kæn nego tamnim, kæn nian kit emeai əpəh itəhəi lokamnim o nian apiəpiə kit, lapin ne nərauiəgən. ²⁶ Nian rafin etaliwək o nolən wək rəhak. Kæn iuəhkir narua asol tiləs io ekimis, kæn emətatig ikin tasilə ikin imaa iakləh min, kæn ikin tasilə ikin imaa natimak min noanol rəha Isrel, kæn ikin tasilə ikin imaa laiuluə min, kæn ikin tasilə ikin e taon asol, kæn ikin tasilə ikin e ikin taruən-aruən ikin, kæn ikin tasilə ikin əpəh itəhəi, kæn ikin tasilə ikin imaa piak eiueiuə min. ²⁷ Emol pik wək, kæn nian tepət esapilən lapin. Nian min neen, nəumis tus io, kæn mətoaoa, kæn nian tepət nigak nagwənən tikə. Kæn nian tepət iatətəp, kæn rəhak natimnat təsahmenən o nətəpən. ²⁸ Kæn taprækis-in natimnat min əh, nian rafin nikik təht pik niməfak min rafin. ²⁹ Okəmə suah kit rəhan nəmegəhən teiuaiu, kæn io min, rəhak nəmegəhən teiuaiu. Okəmə suah kit tatit suah kit min e təfagə rat, kæn nikik titəhmə pik ron.

³⁰ Okəmə ekəike məghat ausit, kæn ekəghat ausit o nat itəm tatəgətun məmə rəhak nəsanənən tikə. ³¹ Kæn Uhgın, u in Uhgın ne Tata rəha İəremərə İesu, itəm katiləs-ipər nərgin nian min rafin namnun tikə, titun məmə io, eseiuən. ³² Əpəh Tamaskes, etəm-iasol rəha Kig Aretas təməlin rəhan mopael min o nehm wirən nafiluə rəha taon

māmā okotegās-in motaskəlīm motilās-ipən io e kalapus. ³³ Məto kəmilās-ipən io e kətim asol kit, kətu-pən nol lan, kilās-ipən e winta e fenis asol kəmol e kəpiel, kən kəhlman-əhlman tuwīn əpəh ləhau, kən inəh suatip emagim lan.

12

Nihlīn kit ne nat kit tahmen e napilaiirən

¹ Ekəike matəghat ausit, nat əpnapin təsolən win e nat kit ikin, məto ekəkəike matən natimnat min tahmen e napilaiirən ne nəghatən wi min itəm ləramərə təmol əp kəm io. ² Ekitun iəfak kit itəm tətahatətə e Kristo.* E nup fotin tinuwīn rəkis, Uhgin təmiləs muwīn əpəh ilis e nego e neai.† Iəkəruru okəmā nīpətin tinatuwīn, o narmin əm, Uhgin əm titun. ³ Kən ekən min māmā iəkəruru okəmā nīpətin tinatuwīn, o narmin əm, Uhgin əm titun. Məto ekitun māmā suah əh, ⁴ Uhgin təmiləs muwīn əpəh iman ikin.‡ Kən in təməto nat anion min itəm təsətuatipən māmā etəmin rəha nətueintən otən. ⁵ Ekəghat ausit o etəm tol nəhlan, məto esəghat ausit atipən ron io, məto ekəghat ausit əm o rəhak nolən min itəm nəsanənən tikə elat. ⁶ Məto okəmā ekən māmā ekəghat ausit, okol esalmələn, məto-inu ekəghat-in nīpahrienən. Məto esəghat ausitən nəhlan, kən tol nəhlan, suah kit tikə itəm otilās-ipər io ilis taprəkis nat itəm tətuatip.

11:33: Wək 9:23-25 * **12:2:** Pol tatəghat-in atip. † **12:2:** Nəghatən Kris ətuatip tatən māmā, “neai tatol kisil lan.” Məto nīpətin tatən māmā “nego e neai u in ikin rəha Uhgin.” ‡ **12:4:** Nəghatən Kris ətuatip tatən māmā, “Paradaes” itəm nīpətin tatən māmā “nego e neai,” ikin itəm netəmin itəm kotətuatip koatuwīn ikin nian okotimis.

Iakolkeike māmə otəplan ahmen io e nat naka itəm ekən, o ekol.

⁷ Uhgin təsolkeikeən māmə etausit o nəghatən wi min itəm in təmol əp kəm io, kən nəghatən min əh kotəwir maprəkis. Kən tol nəhlan təmahlipa nəratən kəm io tahmen e nihlin kit tətəru nīpətik. Nəratən əh in iahləpis rəha Setan māmə tol nahməən e nīpətik, kən tol nəhlan esausitən.

⁸ Emuəh niki Iərəməə mau kisil māmə otiləs-irəkis ron io. ⁹ Məto tən kəm io māmə, “Rəhak nəwīrən asol titun naskəlīmən ik, məto-inu nian rəham nəsanənən tikə, nəsanənən rəhak titun nuwamən mol iahgin e rəham nəmegəhən.” Tol nəhlan, etagien pik māmə ekəghat ausit e rəhak nəmegəhən itəm nəsanənən tikə, māmə nəsanənən rəha Kristo otatig e nəmegəhən rəhak. ¹⁰ O nat əh, etagien nian nəsanənən tikə e nīpətik, kən etagien nian katən rat io, kən etagien e nian iəkis min, kən etagien nian katol nəratən kəm io, kən etagien e nian itəm tiəkis ron io. Etagien elat rafin o nərgi Kristo, məto-inu nian rəhak nəsanənən tikə, kən iatəsanən.

¹¹ Emol nolən rəha ialmə, məto itəmat əm nəmoatəkəike kəm io māmə ekol. Nəməsotiləs-ipərən nərgək, məto təpəwir pik okəmə nəmotol mihin, məto-inu io sənəmə ləhau e “aposol min ilis pik” e nat kit əkəku əm, nat əpnəpīn io etəm əpnəpīn əm. ¹² Nian emətan kitat min itəmat, ematol natimnat itəm tatəgətun io māmə io aposol pahrien kit. Ematol nəmtətin min, ne nat asol min itəm tol narmi netəmim tatiwig, ne nat pispis min e nikitəmat, kən emol e nətəligən rəhak kaifəməh.

¹³ Nat kitiaḥ əm eməsolən e nikitəmat, eməsətapəḥ-inən məni kit otəmat. !Otaluin o təfagə rat u rəhak!§

¹⁴ Roiu iatətul matip məmə ekimnə muag itəmat itəm otol kisil lan. Kən ekəsətapəḥ-inən məni kit otəmat, məto-inu esotolkeikeən rəhatəmat nautə, məto iakolkeike əm itəmat. Otətəlig-in-tu. Sənəmə wək rəha suakəku məmə otehm wir rəhan tata ne mama. Məto in wək rəha tata ne mama məmə okuehm wir rəhalau suakəku.

¹⁵ Tol nəhlan, nīkik tagien məmə ekos-ipinə rafin rəhak natimnat otəmat, kən mos-ipən min rəhak nəmegəhən otəmat. Rəhak nolkeikeən otəmat in tepət, məto rəhatəmat ron io in təkəku əm. !Inu təsətuatipən! ¹⁶ Pəs kotən məmə esətapəḥ-inən məni kit otəmat. Məto itəmat neen koatən məmə emos natimnat otəmat e nolən eko-eko. ¹⁷ ?Tahro? ?Io emos natimnat e nolən eko-eko nian emahl-ipən netənim kəm itəmat, o kəp? !Kəp! ¹⁸ Emuəḥ niki Taetas məmə otuwīn otəmat, kən mahl-ipən piətət kit ilau min. ?Taetas təsosən natimnat otəmat e nolən eko-eko, o kəp? ?Nəkotitun o kəp məmə, rəhatımlau nətəligən kitiaḥ əm, kən matioal nolən kitiaḥ əm?

¹⁹ Kəm-naka nikitəmat təht məmə e nəghatən min rafin əh, emotuhalpīn nəghatən kəm itəmat itəm suah kit təməən otəmat. Kəp. E niganəmti Uhgin, emoatəghat tahmen e netəm rəha Kristo. Kən iolīk min, natimnat rafin itəm koatol, koatol məmə itəmat nakotəsanən. ²⁰ İatən nəhlan məto-inu iatəgin məmə nian ekimnə, kəm-naka ekəplan məmə nəsolən məmə inu iakolkeike mihin. Kən

§ 12:13: Pol tatol milə elat e nəghatən u. 12:13: 2 Kor 11:9

12:18: 2 Kor 8:6,16-18

itəmat min nəkotəplan məmə io esolən məmə inu nakotolkeike mihin. Iatəgin məmə ekəplan itəmat neen kotərgəhəu, neen koatetət, neen koatəmər it e neməha, neen kotəhap-əhap ilat min, neen koatən rat netənim, neen koatən nıkalın netənim, neen koatausit, neen koatol əpnəpın nat. ²¹ Iatəgin məmə nian ekımnə min, rəhak Uhgın otıləs-iaəhau io e nıganəmtitəmat, kən nıkkik otitəgıt kən ekasək otəmat neen itəm nəmotol nolən rat əupən, kən məsotəuhlinən ilat o nolən rat min rəhalat itəm koatol nian rafın, inu koatol nolən rat itəm tol naulisən o nənən, kən nəman ne nıpitan koatan anion, kən koatol nəhlan əpnəpın əm.

13

Namnun nəghatən rəha Pol o nəhgaiirən elat

¹ Inu rəhak naliwəkən itəm tatol kışıl lan otəmat. Naəa Rəha Uhgın tatən məmə, “Nian suah kit tatətu-pən nəghatən e suah kit min, etənim kəiu o kışıl okotəkəike motən nəghatən kitiaə, kən tol nəhlan netənim kotitun məmə nəghatən koatətu-pən lan, in nıpahrienən.”* ² Nian emımnə otəmat itəm tatol kəiu lan, emən-iarəp rəkis nəghatən o nəhgaiirən e netəm koatol təfagə rat ne itəmat rafın, məmə okotapəs təfagə rat min. Kən roiu ekən min nian io əpəh isəu. Nian ekımnə min, ekol nalpınən kəm ilat itəm kəsotapəsən təfagə rat. ³ Ekotol nəhlan məto-inu nıkitəmat təht məmə rəhak nəsanənən tikə, kən itəmat kotolkeike motitun əsas məmə nian iatəghat, in nəghatən

12:21: 2 Kor 13:2 * **13:1:** Dut 19:15 Kəm-naka, Pol tatən məmə rəhan naliwəkən kışıl tahmen e nəghatən rəha netənim kəiu o kışıl.

13:1: Dut 19:15; Mat 18:16; 1 Tim 5:19

rəha Kristo əm. In təsəpouən o nolən wək itəmat min, məto rəhan nəsanənən tepət e nikitəmat.

⁴ Nipahrienən, nian kəmətu-pər e nig kəluau, rəhan nəsanənən tikə e nipətin. Məto tatəmegəh roiu e nəsanənən rəha Uhgın. Kən e nolən kitiah, rəhatimat nəsanənən tikə e nipətitimat, məto itimat ekotəmegəh itimat Kristo e nəsanənən rəha Uhgın, kən nian ekotəghat kəm itəmat, onəkotəplan nəsanənən əh.

⁵ Itəmat atip, otakil wir nəmegəhən rəhatəmat məmə rəhatəmat nahatətəən in pahrien, o kəp. Itəmat atip, nakotehm wir rəhatəmat nolən. ? Nəkotitun o kəp, məmə Kristo Iesu tətətig e nəmegəhən rəhatəmat? !Məto okəmə rəhatəmat nəmegəhən təsətu-pənən nolən rəha nahatətəən, kən Kristo təsatigən e nəmegəhən rəhatəmat!

⁶ Kən emələhəu-pən əskasik rəhak nətəligən məmə onəkotəplan məmə itimat aposol min pahrien.

⁷ Kən roiu, ekoatəfak kəm Uhgın məmə itəmat kit təsolən nat kit tərət. Esotolkeikeən nəhlan məmə otəgətun məmə rəhatimat wək e nikitəmat in təwir mətuatip. Məto ekotolkeike məmə itəmat nəkoatol nolən itəm tətuatip, nat əpnəpın netəmim neen koatən məmə wək rəhatimat tərət. ⁸ Tol nəhlan məto-inu okol itimat esotolən nat kit itəm tahtosig-in nipahrienən, məto ekotitun nolən əm nat itəm tatiləs-ipər nipahrienən. ⁹ Nikitimat tagien nian itimat ekotitun nolən u, itəm nəsanənən tikə lan, məto nəmegəhən rəhatəmat tatətul əskasik. Kən nəfakən rəhatimat otəmat məmə nəmegəhən rəhatəmat tahmen o nətəu-pənən suatip ətuatip.

¹⁰ Nian io əpəh isəu otəmat, ekəte nəhlan o nat

kit. Iarəmərə tinos-ipa rəkis nepədən kəm io, məto esolkeikeən məmə nian ekimnə otəmat, ekəike mol əskasik etəmat e nepədən əh. In təmos-ipa nepədən əh məmə ekiləs-ipər itəmat, sənəmə məmə ekərəkən itəmat.

Namnun nəghatən

¹¹ Piak mın ne winik mın. Inu rəhak namnun nəghatən. Otagien. Otəuhlin rəhatəmat nolən mın. Otəto rəhak nəghatən. Otuwa e nətəligən kitəh. Otətig e nəməlinuən. Kən Uhgın rəha nolkeikeən ne nəməlinuən otətig itəmat mın.

¹² Otən təwır kəm itəmat mın təhmen məmə itəmat kitəh əm e Kristo. ¹³ İəfak mın rafin koatən-ipinə təwır kəm itəmat.

¹⁴ Pəs Iarəmərə İesu Kristo otawte-in rəhan nəwırən kəm itəmat rafin. Kən pəs Uhgın otos-ipən rəhan nolkeikeən kəm itəmat rafin. Kən pəs Narmın Rəha Uhgın otol nikitəmat rafin tol kitəh.

North Tanna New Testament
The New Testament in the North Tanna Language of
Vanuatu
Le Nouveau Testament dans la langue du Nord Tanna
de Vanuatu

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

46e9a2b5-26b8-5301-a079-623f3a20ef8b